

Teater ajak penonton fikir isu dan huraian krisis

Nur Dhuha Esoof

Berita Harian, 3 November 2012

Bayangkan keadaan kucar-kacir yang melanda Singapura sekiranya bekalan elektrik di seluruh pulau terputus.

Mampukah negara ini bangkit daripada musibah yang melanda?

Itulah isu yang akan dikupas dalam pementasan teater *Wouldn't it be Nice* atau *Alangkah Baiknya* yang akan dipersembahkan kumpulan teater tempatan *Drama Box*.

Pementasan percuma itu adalah sebahagian daripada atur cara *Projek Prism* anjuran Institut Pengajian Dasar (IPS) yang akan diadakan di Bangunan Perpustakaan Negara dari 8 hingga 14 November ini.

Projek tersebut bertujuan melibatkan rakyat Singapura sama- sama memikirkan isu dan huraian berkaitan pemerintahan negara ini pada 2022.

Dalam pementasan itu, tiga senario pemerintahan akan dipersembahkan oleh pelakon dalam usaha mencari penyelesaian bagi masalah yang dihadapi.

Senario-senario yang diberikan adalah pemerintah yang mengutamakan pertumbuhan ekonomi; pemerintah yang mengecapi perkembangan kurang pesat namun mempunyai kebajikan tinggi; atau pemerintahan kurang kuat yang memaksa rakyat bergantung pada masyarakat bantu diri.

Di penghujung pementasan itu, penonton diberi peluang menyumbang pendapat mengenai cara terbaik mengatasi masalah yang dihadapi.

Selain menyaksikan pementasan teater, pengunjung juga berpeluang menyanyi dan menghasilkan lirik bagi tiga lagu Singapura yang dihasilkan untuk tahun 2022. Penonton juga diajak memberi pandangan mengenai ciri-ciri yang harus dimiliki warga dan ahli politik teladan.

Pengunjung juga digalakkan membawa barang yang mereka rasa berguna hari ini tetapi tidak lagi pada masa depan untuk dipamerkan di *Pameran Barang-Barang Tidak Berguna*.

Selain itu, mereka diundang menyertai sesi bersempang bersama tetamu-tetamu khas seperti Pengarah Eksekutif *Aware*, Cik Corinna Lim; dan Pengarah IPS, Encik Janadas Devan, yang akan berkongsi visi mereka untuk 2022.

Di akhir lawatan ke *Projek Prism*, pengunjung akan diminta mengisi borang maklum balas yang akan digunakan untuk menggambarkan sikap politik di Singapura.

Hasil maklum balas itu akan dibentangkan di Sidang Perspektif Singapura pada Januari tahun depan.